



**Broj predmeta:** 02-000193/21  
**Broj akta:** 01.11-1273IL-019/21  
**Datum:** 28. 7. 2021. godine  
**Mjesto:** Brčko

Na osnovu člana 52. Statuta Brčko distrikta Bosne i Hercegovine – prečišćeni tekst („Službeni glasnik Brčko distrikta Bosne i Hercegovine“, broj 2/10), člana 10. i člana 11. stav (2) Zakona o Vladi Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj: 22/18 – prečišćeni tekst, 49/18, 8/19, 10/19 i 32/19), člana 29. Zakona o izvršenju budžeta Brčko distrikta Bosne i Hercegovine za 2021. godinu („Službeni glasnik Brčko distrikta BiH“, broj: 04/21 i 12/21), na prijedlog Odjeljenja za obrazovanje, broj predmeta: 02-000193/21 od 19. 07. 2021. godine, Vlada Brčko distrikta Bosne i Hercegovine, na 21. redovnoj sjednici održanoj dana 28. jula 2021. godine, d o n o s i

**ODLUKU**  
**O KRITERIJIMA I NAČINU DODJELE DONACIJA – STIPENDIJA REDOVNIM**  
**STUDENTIMA BRČKO DISTRIKTA BOSNE I HERCEGOVINE ZA PERIOD OD 01. 01.**  
**2021. GODINE DO 30. 09. 2021. GODINE**

**Član 1.**  
**(Predmet odluke)**

Ovom odlukom uređuju se kriteriji, opći uslovi, način i postupak za dodjelu donacija – stipendija, zaključivanje ugovora te ostala pitanja koja se odnose na prava i obaveze redovnih studenata korisnika stipendija Brčko distrikta Bosne i Hercegovine (u daljnjem tekstu: Distrikt) koji se školuju na visokoškolskim ustanovama.

**Član 2.**  
**(Sredstva za donacije – stipendije)**

(1) Sredstva za isplatu donacija – stipendija osigurana su u Budžetu Brčko distrikta Bosne i Hercegovine za 2021. godinu, na organizacionom kodu: 20070001 – Pododjeljenje za visokom obrazovanje i nauku, ekonomski kod: 614200 – Tekuće donacije pojedincima – Analitička stavka: 614234 – Isplate stipendija.

(2) Broj stipendija i njihov mjesečni iznos za svaku kalendarsku godinu utvrđuje Vlada Brčko distrikta Bosne i Hercegovine posebnom odlukom, a na prijedlog Odjeljenja za obrazovanje.

**Član 3.**  
**(Korisnici i način isplate stipendija)**

(1) Stipendije se dodjeljuju redovnim studentima I ciklusa studija na javnim visokoškolskim ustanovama, kao i na ostalim visokoškolskim ustanovama.

(2) Student i njegovi roditelji ili staratelji moraju imati prebivalište u Distriktu najmanje dvije (2) godine do zatvaranja javnog poziva za dodjelu stipendija.

(3) Korisnici stipendije mogu biti studenti koji su u akademskoj 2020/ 2021. godini upisali:

a) drugu i više godine studija na javnim visokoškolskim ustanovama, kao i na ostalim visokoškolskim ustanovama;

b) prvu godinu studija na javnim visokoškolskim ustanovama u akademskoj 2020/ 2021. godini, a koji su proglašeni učenicima generacije ili su ostvarili prosječnu ocjenu 5,00 u svim godinama četverogodišnjeg srednjeg obrazovanja, a koji po istom osnovu nisu bili korisnici stipendije.

c) drugu i više godine studija koji imaju prosjek ocjena 10,00 ili 5,00 u sistemu ocjenjivanja od 1 do 5 na javnim visokoškolskim ustanovama;

d) prvu i više godine studija na javnim visokoškolskim ustanovama, a pripadnik je nacionalne manjine;

e) prvu i više godine studija na javnim visokoškolskim ustanovama, a student je s posebnim potrebama;

f) prvu i više godine studija na javnim visokoškolskim ustanovama, a student je bez oba roditelja.

(4) Stipendije se dodjeljuju redovnim studentima čiji se studij finansira iz budžetskih sredstava, redovnim studentima koji sufinansiraju studij i redovnim studentima koji samofinansiraju studij na javnim visokoškolskim ustanovama te redovnim studentima na ostalim visokoškolskim ustanovama.

(5) Stipendije se neće dodjeljivati studentima koji su školske (akademske) 2020/ 2021. godine upisali I godinu studija, osim onima koji su proglašeni za učenika generacije, kao i studentima I godine studija koji su imali prosjek ocjena 5,00 za vrijeme četverogodišnjeg obrazovanja i na njih se primjenjuju samo opći uslovi iz člana 5. ove odluke, ukoliko se prijave na javni poziv.

(6) Stipendije se dodjeljuju u iznosu od sedam mjesečnih rata, a za nastavak stipendiranja potrebno je da prilože odgovarajuću original potvrdu/ uvjerenje o upisu u narednu godinu studija, prvi put.

(7) Stipendije se ne dodjeljuju u mjesecu julu i augustu.

(8) Student koji ostvari pravo na stipendiju primat će je do vremena do kojeg mu traje status redovnog studenta pod uslovom da ostvaruje ugovorom utvrđene obaveze.

(9) Studenti koji diplomiraju dužni su da donesu uvjerenje o diplomiranju, najkasnije petnaest (15) dana nakon diplomiranja.

#### **Član 4.**

##### **(Sadržaj javnog poziva za dodjelu stipendija)**

(1) Javni poziv za dodjelu stipendija raspisuje Odjeljenje za obrazovanje Vlade Brčko distrikta Bosne i Hercegovine.

(2) Tekst javnog poziva objavljuje se u lokalnim sredstvima informisanja Distrikta, na oglasnoj ploči i web stranici Odjeljenja za obrazovanje: <http://ob.bdcentral.net/>.

(3) Javni poziv sadrži sljedeće stavke:

a) broj i visinu stipendija koje se dodjeljuju;

b) period za dodjelu stipendija;

c) opće uslove za dodjelu stipendija;

d) obrazac prijave;

e) popis dokumenata koje je potrebno priložiti;

f) vrijeme trajanja javnog poziva;

g) rok u kojem će biti objavljeni rezultati javnog poziva;

h) naziv organa kojem se podnose prijave;

i) druge potrebne podatke.

**Član 5.**  
**(Opći uslovi)**

Pravo učestvovanja na javnom pozivu ima student koji ispunjava sljedeće uslove:

- a) da je državljanin BiH;
- b) da student i njegovi roditelji ili staratelji imaju prebivalište u Distriktu najmanje dvije godine do zatvaranja javnog poziva za dodjelu stipendija;
- c) da je redovan student;
- d) da ne prima stipendiju od neke druge institucije;
- e) da u trenutku podnošenja prijave ne ponavlja godinu studija;
- f) da prijavljeni kandidat nije stariji od 27 godina života zaključno s danom zatvaranja javnog poziva.

**Član 6.**  
**(Kriterijum za dodjelu stipendija)**

Kandidati se boduju na osnovu ostvarenog broja bodova po sljedećim kriterijima:

- a) ostvarenog uspjeha;
- b) socijalno-ekonomskog statusa;
- c) dostignute godine obrazovanja.

**Član 7.**  
**(Ostvareni uspjeh)**

(1) Po kriterijumu ostvarenog uspjeha bodovanje se vrši na sljedeći način: za studente druge i viših godina studija, odnosno za studente prve i viših godina koji su pripadnici nacionalnih manjina ili su studenti s posebnim potrebama

po skali ocjena od 6 do 10	po skali ocjena od 2 do 5	broj bodova
od 6,00 do 7,49	od 2,00 do 3,11	od 12,00 do 14,98
od 7,50 do 8,00	od 3,12 do 3,50	od 15,00 do 16,00
od 8,01 do 8,49	od 3,507 do 3,867	od 16,02 do 16,98
od 8,50 do 9,00	od 3,87 do 4,25	od 17,00 do 18,00
od 9,01 do 9,49	od 4,257 do 4,617	od 18,01 do 18,98
od 9,50 do 10,00	od 4,62 do 5,00	od 19,00 do 20,00

(2) Ekvivalentne ocjene (ili prosječne ocjene) u sistemu visoko obrazovanja Brčko distrikta BiH, za ocjene dobijene u visokoškolskim ustanovama u inostranstvu, preračunavaju se na sljedeći način:

$$S_{(6-10)} = \frac{6 \cdot S_B - 10 \cdot S_L + 4 \cdot S}{S_B - S_L}$$

gdje je:

S - ocjena u stranom visokom obrazovanju za koju se računa ekvivalent u našem visokom obrazovanju,

$S_{(6-10)}$  - ekvivalentna ocjena u našem visokom obrazovanju,

$S_B$  - najbolja ocjena u stranom visokom obrazovanju,

**S<sub>L</sub>** - najlošija prolazna ocjena u stranom visokom obrazovanju.

(3) Ukoliko je potrebno računati prosječnu ekvivalentnu ocjenu za sistem koji nije primjenjiv za računanje po formuli, tada kandidat treba da priloži zvaničnu metodologiju ocjenjivanja koja vrijedi u zemlji studiranja.

(4) U slučaju da komisija ne može utvrditi metodologiju, raspon ocjena iz države studiranja primjenjit će se prosječna ocjena osam (8) za opisnu ocjenu „položio“, odnosno dodijelit će se 16 bodova.

### **Član 8. (Socijalno-ekonomski status)**

Kriterij za socijalno-ekonomski status obuhvata:

- a) prosječna mjesečna primanja;
- b) broj djece u domaćinstvu koja se školuju;
- c) porodični status;
- d) da je studij finansiran iz budžetskih sredstava države, entiteta ili kantona;
- e) da student sufinansira ili samofinansira studij na javnoj visokoškolskoj ustanovi.

### **Član 9. (Način bodovanja socijalno-ekonomskog statusa)**

(1) Socijalno-ekonomski status odnosi se na:

- a) prosječna mjesečna primanja, bodovanje zavisi od primanja po članu domaćinstva:
  - 1) bez primanja .....20 bodova
  - 2) od 101 do 200 KM ..... 16 bodova
  - 3) od 201 do 300 KM .....12 bodova
  - 4) od 301 do 400 KM .....8 boda
  - 5) od 401 do 500 KM .....4 boda
  - 6) preko 500 KM .....0 bodova
- b) za svako ostalo dijete u domaćinstvu koje se obrazuje:
  - 1) u osnovnoj školi .....2 boda
  - 2) u srednjoj školi .....2,5 boda
  - 3) na visokoškolskoj ustanovi .....3 boda
- c) porodični status:
  - 1) djeca bez oba roditelja.....35 bodova
  - 2) djeca bez jednog roditelja..... 25 bodova
  - 3) djeca ratnih vojnih invalida od 1. do 10. kategorije..... 20 bodova
  - 4) djeca roditelja invalida rada sa najmanje 50% invaliditeta..... 15 bodova
  - 5) djeca civilnih žrtava rata i djeca logoraša ..... 10 bodova
  - 6) djeca rastavljenih ili razvedenih roditelja ..... 5 bodova
- d) student čiji se studij finansira iz budžetskih sredstava države, entiteta ili kantona.....30 bodova
- e) student koji sufinansira ili samofinansira studij na javnoj visokoškolskoj ustanovi.....25 bodova

(2) Prijavljeni kandidati s odgovarajućom dokumentacijom mogu ostvariti bodove pod tačkom c) samo po jednom osnovu i to po povoljnijem za njih.

**Član 10.**  
**(Način bodovanja godine obrazovanja)**

Redovnom studentu akademske 2020/ 2021. godine se dodjeljuje po pet (5) bodova za upisanu godinu studija, naprimjer: II godina studija – 5 bodova, III godina studija – 10 bodova, IV godina studija 15 bodova, V godina studija – 20 bodova i VI godina studija – 25 bodova.

**Član 11.**  
**(Prijava i dokumentacija)**

**(1) Uz prijavu za ostvarivanje prava na stipendiju student druge i viših godina studija, treba da priloži i sljedeću dokumentaciju:**

- izvod iz matične knjige rođenih, ne stariji od 6 mjeseci (Odjeljenje za obrazovanje pribavlja po službenoj dužnosti, osim u slučaju kad student nije upisan u matičnu knjigu rođenih u Distriktu);
- potvrdu ili uvjerenje o mjestu prebivališta studenta i njegovih roditelja ili staratelja koji imaju prebivalište u Distriktu najmanje dvije (2) godine do dana zatvaranja javnog poziva (Odjeljenje za obrazovanje pribavlja po službenoj dužnosti);
- original potvrdu ili uvjerenje o upisu godine studija kao redovan student (prvi put);
- original potvrdu ili uvjerenje da se studij finansira iz budžetskih sredstava;
- original potvrdu ili uvjerenje da se studij sufinansira ili samofinansira na javnoj visokoškolskoj ustanovi;
- fotokopija izvoda iz matične knjige umrlih za studenta bez oba roditelja;
- original potvrdu ili uvjerenje fakulteta o položenim ispitima s prosječnom ocjenom ne starije od mjesec dana od dana otvaranja javnog poziva;
- izjavu o zajedničkom domaćinstvu s podacima o srodstvu sa svim navedenim članovima i jedinstvenim matičnim brojevima svih članova na navedenoj izjavi (ukoliko student i njegovi roditelji ili staratelji nemaju istu adresu prebivališta u Distriktu, smatraju se članovima zajedničkog domaćinstva u smislu ove odluke i dužni su ih prijaviti na izjavu o zajedničkom domaćinstvu);
- original potvrdu ili uvjerenje iz škole/ fakulteta za brata/ sestru da su učenici ili studenti;
- original potvrdu ili uvjerenje poslodavca o prosjeku plate svih zaposlenih članova domaćinstva u posljednja tri mjeseca, ili posljednje tri platne liste;
- original posljednji ček od penzije za članove domaćinstva koji ostvaruju pravo na penziju;
- original porezno uvjerenje za članove domaćinstva koji nisu zaposleni, a koji nisu u evidenciji Zavoda za zapošljavanje;
- original potvrdu ili uvjerenje Zavoda za zapošljavanje za nezaposlene članove domaćinstva;
- fotokopiju izvoda iz matične knjige umrlih za roditelja;
- original potvrdu ili uvjerenje nadležnog organa javne uprave da se radi o djetetu ratnog vojnog invalida,
- fotokopiju potvrde ili uvjerenja nadležnog organa o invalidnosti rada roditelja ili staratelja;
- original potvrdu ili uvjerenje nadležnog organa ili udruženja da se radi o djeci civilnih žrtava rata i logoraša;

- fotokopiju rješenja o rastavi braka.

**(2) Uz prijavu za ostvarivanje prava na stipendiju student s posebnim potrebama, student pripadnik nacionalne manjine i student bez oba roditelja treba da priloži i sljedeću dokumentaciju:**

- izvod iz matične knjige rođenih, ne stariji od 6 mjeseci (Odjeljenje za obrazovanje pribavlja po službenoj dužnosti, osim u slučaju kad student nije upisan u matičnu knjigu rođenih u Distriktu);
- potvrdu ili uvjerenje o mjestu prebivališta studenta i njegovih roditelja ili staratelja koji imaju prebivalište u Distriktu najmanje 2 godine do dana zatvaranja javnog poziva (Odjeljenje za obrazovanje pribavlja po službenoj dužnosti);
- original potvrdu ili uvjerenje o upisu godine studija kao redovan student na visokoškolskoj ustanovi;
- izjavu o zajedničkom domaćinstvu s podacima o srodstvu sa svim navedenim članovima i jedinstvenim matičnim brojevima svih članova na navedenoj izjavi (ukoliko student i njegovi roditelji ili staratelji nemaju istu adresu prebivališta u Distriktu, smatraju se članovima zajedničkog domaćinstva u smislu ove odluke i dužni su ih prijaviti na izjavu o zajedničkom domaćinstvu);
- fotokopiju izvoda iz matične knjige rođenih kao dokaz nacionalne pripadnosti studenta ili drugi relevantan dokaz (samo za pripadnika nacionalne manjine);
- dokaz da je student s posebnim potrebama (rješenje o kategorizaciji – fotokopija).
- fotokopiju izvoda iz matične knjige umrlih za oba roditelja.

**(3) Uz prijavu za ostvarivanje prava na stipendiju student prve godine studija na javnim visokoškolskim ustanovama u akademskoj 2020/2021. godini, a koji je proglašen učenikom generacije ili je ostvario prosječnu ocjenu 5,00 u svim godinama četverogodišnjeg srednjeg obrazovanja u nekoj od srednjih škola Brčko distrikta BiH treba priložiti sljedeće dokumente:**

- izvod iz matične knjige rođenih, ne stariji od 6 mjeseci (Odjeljenje za obrazovanje pribavlja po službenoj dužnosti, osim u slučaju kad student nije upisan u matičnu knjigu rođenih u Distriktu);
- potvrdu ili uvjerenje o mjestu prebivališta studenta i njegovih roditelja ili staratelja koji imaju prebivalište u Distriktu najmanje 2 godine do dana zatvaranja javnog poziva (Odjeljenje za obrazovanje pribavlja po službenoj dužnosti);
- original potvrdu ili uvjerenje o upisu godine studija kao redovan student na javnoj visokoškolskoj ustanovi;
- izjavu o zajedničkom domaćinstvu s podacima o srodstvu sa svim navedenim članovima i jedinstvenim matičnim brojevima svih članova na navedenoj izjavi (ukoliko student i njegovi roditelji ili staratelji nemaju istu adresu prebivališta u Distriktu, smatraju se članovima zajedničkog domaćinstva u smislu ove odluke i dužni su ih prijaviti na izjavu o zajedničkom domaćinstvu);
- fotokopiju diplome o proglašenju učenikom generacije;
- fotokopije svjedočanstava za svaki razred srednje škole kojim dokazuje da je ostvario prosjek ocjena 5,00 za vrijeme četverogodišnjeg srednjeg obrazovanja.

**(4) Uz prijavu za ostvarivanje prava na stipendiju student druge i više godine studija koji ima prosjek ocjena 10,00 u sistemu ocjenjivanja od 5 do 10 ili prosjek ocjena 5,00 u sistemu**

**ocjenjivanja od 1 do 5, kao i ekvivalentnim ocjenama u drugim sistemima ocjenjivanja na javnim visokoškolskim ustanovama, treba priložiti sljedeće dokumente:**

- izvod iz matične knjige rođenih, ne stariji od 6 mjeseci (Odjeljenje za obrazovanje pribavlja po službenoj dužnosti, osim u slučaju kad student nije upisan u matičnu knjigu rođenih u Distriktu);
- potvrdu ili uvjerenje o mjestu prebivališta studenta i njegovih roditelja ili staratelja koji imaju prebivalište u Distriktu najmanje dvije (2) godine do dana zatvaranja javnog poziva (Odjeljenje za obrazovanje pribavlja po službenoj dužnosti);
- original potvrdu ili uvjerenje o upisu godine studija kao redovan student na javnoj visokoškolskoj ustanovi;
- izjavu o zajedničkom domaćinstvu s podacima o srodstvu sa svim navedenim članovima i jedinstvenim matičnim brojevima svih članova na navedenoj izjavi (ukoliko student i njegovi roditelji ili staratelji nemaju istu adresu prebivališta u Distriktu, smatraju se članovima zajedničkog domaćinstva u smislu ove odluke i dužni su ih prijaviti na izjavu o zajedničkom domaćinstvu);
- original potvrdu ili uvjerenje fakulteta o položenim ispitima s prosječnom ocjenom, ne starije od mjesec dana od dana otvaranja javnog poziva.

**Član 11. a.**  
**(Prijem dokumentacije)**

(1) Šef Odjeljenja za obrazovanje vrši primopredaju dokumentacije iz člana 11. ove Odluke predsjedniku komisije, uz spisak prijavljenih kandidata i spisak dosadašnjih korisnika stipendija.

**Član 12.**  
**(Komisija za dodjelu stipendija)**

(1) Šef Odjeljenja za obrazovanje imenuje Komisiju za dodjelu stipendija redovnim studentima Brčko distrikta BiH (u daljnjem tekstu: Komisija) sa najmanje sedam (7) članova, najkasnije sedm (7) dana prije zaključivanja javnog poziva za dodjelu stipendija.

(2) Komisija sačinjava preliminarnu rang-listu u roku od 30 dana od dana zaključivanja javnog poziva i objavljuje je na oglasnoj ploči i na web stranici Vlade Brčko distrikta Bosne i Hercegovine.

(3) Kandidat koji je nezadovoljan rang-listom ima pravo prigovora u roku od osam (8) dana od dana objavljivanja preliminarne rang-liste na oglasnoj ploči i na web stranici Odjeljenja za obrazovanje.

(4) Po objavljivanju preliminarne rang-liste šef Odjeljenja će imenovati Komisiju za prigovore koja će prigovore nezadovoljnih kandidata razmotriti i odlučiti tako što će uvažiti ili odbiti prigovore kao neosnovane te sačiniti prijedlog konačne rang-liste.

(5) Rok za odlučivanje po prigovorima i sačinjavanje prijedloga konačne rang-liste je 15 dana po isteku roka iz stava (3) ovoga člana.

(6) Kandidati koji su uputili prigovore na preliminarnu rang-liste obavještavaju se o ishodu prigovora.

(7) Konačnu rang-listu za dodjelu stipendija, na prijedlog šefa Odjeljenja, usvaja Vlada Distrikta.

(8) U slučaju naknadnog utvrđivanja neispunjavanja kriterija iz ove Odluke, student gubi pravo na dodjelu stipendija te se sa istim neće zaključiti ugovor, odnosno raskinut će se ukoliko je već zaključen.

### **Član 13. (Dodjela stipendija)**

Ukoliko se desi da od ukupnog broja stipendija koje se dodjeljuju na rang-listi ne bude nijedan od pripadnika konstitutivnih naroda ili je taj broj manji od 10%, primijenit će se sljedeće: od ukupnog broja stipendija koje se dodjeljuju izuzet će se maksimalno 10% najlošije rangiranih na listi, a za njihovo popunjavanje do ukupno utvrđenog broja dodijelit će se stipendije studentima pripadnicima onog naroda koji nije bio zastupljen na rang-listi koja je prethodila, a koji će opet biti rangirani redoslijedom po ovim kriterijima.

Kandidat kome se dodjeljuje stipendija po osnovu ovog člana dužan je priložiti isključivo izvod iz matične knjige rođenih iz kojeg je vidljiva nacionalna pripadnosti studenta.

### **Član 14. (Prednost pri istom broju bodova)**

Ukoliko dva ili više kandidata imaju isti broj bodova, prednost ima kandidat prema sljedećem redoslijedu:

- a) bez oba roditelja;
- b) bez jednog roditelja;
- c) čija porodica ima manji prosjek primanja po članu domaćinstva;
- d) koji ima bolji prosjek ocjena.

### **Član 15. (Sadržaj ugovora o stipendiranju)**

(1) Dodjelom stipendije student s Odjeljenjem za obrazovanje zaključuje ugovor koji sadrži:

- a) naznaku ugovornih strana;
- b) visinu stipendije;
- c) fakultet koji pohađa;
- d) vrijeme i uslove korištenja stipendije;
- e) dinamiku isplate stipendije;
- f) prava i obaveze ugovornih strana.

(2) Ugovor o stipendiranju potpisuju šef Odjeljenja za obrazovanje, po ovlaštenju gradonačelnika, i student.

(3) Isplata stipendije vrši se preko žiro ili tekućeg računa studenta.

### **Član 16. (Gubitak prava na dodijeljenu stipendiju)**

(1) Stipendista gubi pravo na stipendiju ukoliko:

- a) se utvrdi da je pravo na stipendiju ostvario na osnovu neistinitih ili nepotpunih podataka kao i u slučaju iz člana 12, stav (8) ove Odluke.
- b) započne da prima stipendiju od drugog davaoca;
- c) prekine studij ili promijeni studij sa javnog fakulteta na studij koji se ne finansira iz budžetskih sredstava države, entiteta ili kantona;
- d) do roka utvrđenog ugovorom o stipendiranju ne dostavi original potvrdu o upisu u narednu godinu studija, prvi put;
- e) ne potpiše ugovor o stipendiranju u za to određenom roku;



- f) zasnuje radni odnos;
- g) obnovi godinu studija dva ili više puta.
- h) upiše apsolventski/ produženi status.

**Član 17.**  
**(Nadležnost)**

Za provođenje odredbi ove odluke zadužuje se Odjeljenje za obrazovanje Vlade Brčko distrikta BiH.

**Članak 18.**  
**(Stavljanje van snage)**

Ovom odlukom stavlja se van snage Odluka o kriterijima i načinu dodjele stipendija redovnim studentima Brčko distrikta Bosne i Hercegovine, broj predmeta: 02-000104/20, broj akta 01.11-1161DS-010/20 od 9. 7. 2020. godine.

**Članak 19.**

Ova odluka stupa na snagu danom donošenja i objavit će se u „Službenom glasniku Brčko distrikta Bosne i Hercegovine“.

**DOSTAVITI:**

1. Članovima Vlade Brčko distrikta BiH,
2. Odjeljenju za obrazovanje,
3. Uredu za upravljanje javnom imovinom  
Brčko distrikta BiH,
4. Direkciji za financije Brčko distrikta BiH,
5. Uredu koordinatora Brčko distrikta BiH u  
Vijeću ministara BiH,
6. Kabinetu gradonačelnika,
7. Sekretaru Vlade Brčko distrikta BiH,
8. Sektoru za opće poslove i strateško planiranje,
9. „Službenom glasniku Brčko distrikta BiH“,
10. Arhivi.

**GRADONAČELNIK**

Esed Kadrić